

La'ó Hamutuk

Instituto Timor-Leste ba Monitor no Analiza Dezenvolvimentu

Rua D. Alberto Ricardo da Silva, Bebora, Dili

Tel: +670 332 1040 Mobile: +670 7723 4330

Email: laohamutuk@gmail.com Website: www.laohamutuk.org



19 Outubru 2022

Komunikadu Imprensa

La'ó Hamutuk Konsidera Proposta Orsamentu Estadu ba 2023 Ignora Realidade Situasaun Finansas Estadu

Horiseik, dia 18 de Outubru 2022, ONG La'ó Hamutuk hato'o submisaun ida¹ ba Deputadu/a sira iha Parlamentu Nasionál (PN) kona-ba proposta Lei Orsamentu Jeral Estadu (OJE) ba tinan 2023. Ho submisaun ida ne'e, La'ó Hamutuk hakarak atu kontribui ba avaliasaun no diskusaun kona ba OJE 2023 hodi bele realiza orsamentu ne'ebé sustentável no haktuir nesesidade povu nian.

Debate Parlamentár durante periodu orsamentál kada tinan, tenke sai hanesan oportunidade polítika atu membru PN, Governu no públiku uza ba avalia, diskute no dezeña planeamentu ne'ebé estratéjiku no nesesáriu hodi hatán ba problema sira ne'ebé Povu no Nasaun enfrenta tinan barak.

Pontu importante sira ne'ebé La'ó Hamutuk hato'ó liu husi submisaun hanesan tuir mai:

➤ **Sustentabilidade**

Realidade situasaun finansiamentu estadu iha perigu nia laran, no La'ó Hamutuk fó ona avizu iha tinan barak nia laran. Iha proposta OJE 2023, Governu apresenta senáriu ida hodi prolonga vida util hosi Fundu Petróleu ate 2045. Signifika sei iha oportunidade boot ba governu atu diversifika ekonomia hodi adia krize ne'ebé bele mosu bainhira hasoru rai naruk fiskál (*fiscal cliff*) ne'ebe bainhira Fundu Petrolíferu mamuk ona, bele akontese iha tinan 2034 tuir predisaun Ministeriu Finansas nian. Tuir modelu sustentável liu ida ne'ebé governu apresenta iha *Livru Relatóriu Proposta OJE 2023*, atu prolonga Fundu Petrolíferu to'ó 2045, presiza redús despeza kada tinan 3% to'ó 2034. Maibé iha tabela balun iha livru OJE hatudu despeza OJE inklui levantamentu Fundu Petróleu sei sa'e kada tinan to'ó 2027. Nune'e ami hanoin katak maske governu rekoñese nasaun ne'e iha perigu ba monu iha rai naruk fiskal, maibé continua la fó importánsia no falta atu responde ba realidade ida ne'e. La'ó Hamutuk konsidera la iha valór atu diskute de'it modelu sustentável se la implementa.

La'ó Hamutuk mós observa katak projesaun jerál ne'ebé Governu consege fornese la iha konsisténsia, no sujere atu fornese ba PN no públiku projesaun loloos kona ba despeza globál no kustu ba kada program ba tinan haat ba oin, atu ajuda kada Deputadu/a foti desizaun matenek.

➤ **Dependénsia ba Petróleu**

Iha submisaun ba PN, La'ó Hamutuk nota katak agora daudaun Timor-Leste depende de'it ona ba investimentu Fundu Petrolíferu iha merkadu finanseiru internasionál, ne'ebé ita kuaze sofre ka lakon ona biliaun \$2 resin iha tinan ne'e. Infelizmente, livru OJE falta atu deskreve ho loos risku sira,

¹ Bele hetan submisaun kompletu iha <https://www.laohamutuk.org/econ/OJE23/221017LHSubPNOGE2023te.pdf> no tradusaun ba Ingles iha <https://www.laohamutuk.org/econ/OJE23/221017LHSubPNOGE2023en.pdf>

no senáriu sira kona ba Fundu Petrolíferu kontinua asume retornu 4.1% ba futuro no falta atu konsidera possibilidade ba retornu investimentu negativu ka ki'ik ba futuro.

Maske iha tinan barak nia laran, Fundu Petrolíferu finansia programa no atividade estadu durante ne'e, maibé infelizmente ita la konsege kaer oportunidade atu harii sistema ekonómiku ida ne'ebé produtivu, sustentável no diversifikadu. Governu kontinua mehi katak reseita indústrija mina no gas sei ajuda nasaun ne'e nian ekonomia ba tempu naruk hodi ignora dezenvolve setór produtivu no sustentável. Ho nune'e, La'ó Hamutuk nia submisaun husu Deputadu/a atu rekoñese katak setór petróleu ho hanoin katak setór ida ne'e sei la resolve problema sira ne'ebé ita hasoru hela no sei falta atu lori benefísiu ba povu.

➤ **Transparénsia no Akontabilidade**

La'ó Hamutuk hanoin katak transparénsia no akontabilidade tenke kontinua sai prioridade iha governasaun no estadu ida ne'e. Infelizmente, La'ó Hamutuk observa frakeza balun iha implementasaun transparénsia iha prosesu orsamentál ida ne'e.

Por ezemplu, website hosi Parlamentu Nasionál ne'ebé la funsiona, no kona-ba 'audiénsia públiku' ne'ebé iha realidade la loke ba públiku. La'ó Hamutuk mós sujere atu mantén pratika di'ak balun ne'ebé liu ona hodi prodús livru proposta OJE iha lingua Tetun no Ingles, la'os Portugés de'it.

Hanesan sosiedade sivil, triste tebes katak la hetan oportunidade atu fó testemuña iha audiénsia ne'ebé Komisaun C PN realiza. Ami hanoin katak prosesu orsamentál sai forte liu ho partisipasaun husi sosiedade sivil, no enkoraja atu PN bele hadi'ak liu tan espasu ba ami no públiku hodi fornese analiza no hariku liu tan idea antes debate ho Governu.

La'ó Hamutuk mós sujere katak Ministériu Finanzas presiza klarifika orsamentu FCLN, no tenke konsidera FCLN re-apropria hosi 2022 ba OJE 2023 atu la halo konfuzau ba públiku.

➤ **Prioridade no Estratéjia**

La'ó Hamutuk kestiona kapasidade Governu atu realiza medida 275 ho qualidade, konsidera nivel ezekusaun iha pasadu no mós realidade katak tinan oin Membru Governu barak no mós sira nia staff sei ba halo kampaña polítika. Di'ak liu fó prioridade ba programa ne'ebé realistiku tuir kbiit no rekursu umanu ne'ebé iha atu garante duni ezekusaun no qualidade.

La'ó Hamutuk nota katak alokasaun ba setór sira ne'ebé liga diretamente ba dezenvolvimentu rekursu umanu (edukasaun, saúde, bee mós no agrikultura) hetan de'it 16% husi OJE tomak. Nune'e ami enkoraja Deputadu/a sira atu diskute ho kle'an ho Governu durante debate orsamentu.

Atu realiza orsamentu ne'ebé efikás, La'ó Hamutuk sujere ba PN atu hametin fali prosesu avaliasaun programa atu asegura iha duni benefísiu ba povu, no atu revée fali alokasaun orsamentu balun ne'ebé seidak iha evidénsia kona ba benefísiu.

Iha submisaun ne'e, La'ó Hamutuk sujere rekomendasaun hitu ba Parlamentu no Governu atu hadi'ak liu tan OJE 2023 no prosesu orsamentál.

Ami husi La'ó Hamutuk sempre pruntu atu oferese ami nia komentáriu analítiku hodi ajuda media sira atu halo reportajen ne'ebé loloos no fasilita debate no diskusaun bazeia ba dadus.

Obrigadu ua'in ba Ita-boot sira hotu nia atensaun no konsiderasaun tomak ba ami nia konvite. Bele kontaktu ba númeru telefone +670-77432621 hodi husu pergunta ka halo konfirmasaun.

- Remata -